



Heinrich Schmid-Valier Sedrun

22.05.1909 - 04.07.2002

La damaun dils 5 da fenadur 2002 ha il zenn grond dalla baselgia s.Vigeli a Sedrun annunziau la mort da Heinrich Schmid - Valier, ch'il Segner haveva clamau la ser'avon tier El a casa. Il Heinrich ei naschius.a Gionda ils 22 da matg igl onn 1909, sco secund da siat fargliuns. Siu bab era il Heinrich, sia mumma la Maria Barla naschida Schmid. Ina greva frida pil giuven, era la prematura mort da sia buna mumma stada. Gia igl onn 1932, cu el haveva per 23 onns, ha

lezza stuiu bandunar la gronda famiglia. La sora pintga, la Dora, haveva mo 7 onns. Cheu ha ei dau nuot auter che da turnar si dalla bassa e segidar cul bab e cun ses fargliuns. Igl onn 1937 ha siu bab ed el baghegiau la resgia a Mira, ensemes cul Gion Antoni Beer, il Bastgaun sco el vegneva numnaus. Dasperas vegneva ei aunc fatg in tec il pur. Igl onn 1939 baghegia il Heinrich dadens la resgia, casa. In onn pli tard marida el la Seppa Valier da Camischolas. Els secasan silsuenter lu en quella. Otg affons han els tratg si, quei che ha dau, sper il puresser e la resgia bia lavur per enzatgi. Mo il Heinrich ha mai giu sterment dalla lavur. Ils onns 60, cu ils mirs da fermada ein vegni baghegiai, ha la coniunctura aulta entschiet, e quei era sin resgia. Mo tier tut quei, ha el dismiss il puresser per igl onn 1970. Diesch onns memia tard sco el scheva. Ord il clavau davos casa han els baghegiau habitaziuns da vacanzas. Cunquei ch'el saveva sedar giu bein cun ils hospes, turnavan quels lu adina puspei bugen tier els en vacanzas. E cu el ei vegnius pensiunaus, ha el, ensemes cun sia dunna era vuliu prender in tec pli lev e lu surdau la resgia al fegl Emil. Mo las habitaziuns ed il contact culs hospes han els mantenui aunc biars onns. Cheu ha il Heinrich entschiet el temps liber a zambergiar, bellezia caussas ord lenn. Dis en e dis ora anflavan ins el en siu luvratori. En quel era el el siatavel tschiel. Mo culs 90 ein stai a dies, han las forzas lu tec a tec schau suenter ed ins anflava el pli e pli pauc en siu luvratori. Aschia ein els dus sedicidi, il schaner 2001, da serender en casa d'attempai. Cunquei ch'ei era buca plaz en casa S. Vigeli a Sedrun, han els bugen ni nuidis stuiu serender per in temps ella casa S. Giusep a Cumpadiels. Bi e bien han els giu leu, mo il schar encrescher per la patria ei restaus tochen ch'els han saviu turnar il november 2001 puspei en sia biala Val Tujetsch. En casa S. Vigeli ha el aunc astgau guder zacons bials dis, tochen ch'el ha bandunau il fenadur targau per adina sia dunna e sia famiglia.

EL RUAUSSI EN PAISCH!